



## Auals e flüms ün mosaic da spazis vitals

Vernissascha dal cudesch «Gewässerperlen» a Scuol

**Auas sulvadias dvaintan adüna plü raras in Svizra. I'l cudesch «Gewässerperlen» da Martin Arnold ed Urs Fitze cuntogna 23 exaimpels, tschinch da quels in Grischun, chi sun pac influenzats da l'uman.**

«Perlas dad auas sun lais, flüms, auals, ma eir ischlas e spordschan spazis vital per peschs, bes-chas, insects e plantas. Els sun paradis pella vita in e sper l'aua», uschea definischa il WWF l'expressiun perlas dad auas. Perquai s'ingascha l'organisaziun pella protecziun da l'ambaint pel mantegnimaint da quistas perlas. In marcurdi vaiva invidà il WWF Grischun i'l local cultural dal Bogn Engiadina Scuol (BES) a la vernissascha dal cudesch «Gewässerperlen» da Martin Arnold ed Urs Fitze. Preschaints d'eiran Fitze e sia parteneria, Anita Mazzetta chi maina la gestiun dal WWF Grischun e Philipp Gunzinger in sia funcziun sco comember dal comité directiv dal proget

pilot «EN-Engiadina». La vernissascha es gnüda imbellida culla musica e'l chant da la pianista indigena Cinzia Regensburger.

**«Impreschiunà da la forza da l'aua»**

Il co-autur Urs Fitze ha ingrazchè al WWF per l'incumbenza: «Da l'on 2016 ha quist'organisaziun examinà ingio chi dà amo perlas dad auas in Svizra», ha'l dit, «e nus vain pudü preschantar in nos cudesch 23 da quellas perlas.»

Tschinch as rechattan in Grischun, trais in Engiadina. I's tratta da la Branca sper Ramosch, da l'Ova Chamuera pro La Punt-Chamuesch, dal Beverin pro Bever, da la Greina, Glenner e Sumvitg e dal Rain Anterior culla Ruinaulta. La chavorgia dal Rain fuorma il plü lung uschedit «canyon» in Svizra. Ils oters flüms ed auals as rechattan in tuot la Svizra. Ils duos autuors Arnold e Fitze descrivan las 23 perlas in fuorma da reportascha. Els manzunan eir scha e co cha'ls umans han influenzà quistas auas, per exaimpel in chanalisond parts dals flüms. Implü as chatta i'l cudesch eir chartas da geografia ed indicaziuns nüzzaivlas per quels chi lessan ir svesa a far spassegiadas lung ils flüms ed auals

descrits. «La plü gronda impreschiun m'ha fatta la bellezza da l'aua e sia forza immensa», ha dit Urs Fitze, «mincha flüm ha ün oter character.»

**«Perlas chi's sto proteger»**

«Causa cha l'aua vain üttilisada in Svizra fermamaing, per sauar, per far naiv e per far energia, sun ils spazis vitals in o a la riva da flüms ed auals in Svizra periclitats», ha manzunà Anita Mazzetta, cha quistas influenzas da l'uman hajan per consequenza cha 60 pertschient da las spezchas da pesch sajan in Svizra sülla glista cotschna. La manadra da gestiun dal WWF Grischun ha nomnà perche chi saja essenzial da proteger las perlas dad auas: «Ellas fuorman la pütta principala per mantegner la vita, la biodiversità ill'aua ed a la riva.» Las ischlas dan, sco ch'ella ha cuntinuà, dachasa e protecziun a bleras creatüras e plantas. «Circa ün terz da las plantas chi creschan in Svizra as chatta in ischlas, e la surfatscha da quellas nun es gnanca ün pertschient da la surfatscha totala da nos pajais.» Il cudesch davart las perlas dad auas es cumparü illa chas'editura at-Verlag.

(anr/fa)



Philipp Gunzinger, Urs Fitze ed Anita Mazzetta han contribui minchün üna part a la vernissascha dal cudesch «Gewässerperlen» a Scuol. fotografia: Flurin Andry

## Model per coordinar l'utilisaziun da l'aua

In december 2015 d'eira gnü lantschà il proget d'Interreg SPARE (Strategic Planning for Alpine River Ecosystems). Siond cha l'Engiadina Bassa es la segund sütta regiun da la Svizra han ils respunsabels dumandà a la fundaziun Pro Terra Engiadina (PTE) culla mandra Angelika Abderhalden sch'els as partecipessan a quist proget. Id es gnü lantschà il proget EN-Engiadina e fundà ün comitè directiv culla biologa Abderhalden, Ruedi Haller dal Parc Naziunal Svizzer, Walter Bernegger da l'Energia Engiadina e cun rapreschan-

tants dals uffizis pella natüra chantunals e federals President dal comitè directiv per quist proget es Philipp Gunzinger da Scuol. «Il manaschamaint cumpressiv da las auas curraintas cha nus vain elavurà in Engiadina Bassa servirà sco model per otras regiuns in muntogna», ha declerà Philipp Gunzinger in occasiun da la vernissascha dal cudesch «Gewässerperlen» a Scuol, «grazcha a quist model as poja coordinar l'utilisaziun da l'aua da differentas varts, da l'agricultura fin pro las ouvras idraulicas e'l turissem.» (anr/fa)



## Perlas dad auas in Engiadina

**WWF Grischun** In tuot 23 auals e flüms preschaintan Martin Arnold ed Urs Fitze in lur cudesch «Gewässerperlen» chi'd es güsta cumparü. I's tratta dad auas e rivas cun üna gronda biodiversità. L'aua in Svizra vain üttilisada fermamaing per far energia, per sauar, per far naiv ed oter plü. Il WWF ha guardà ingio chi sun flüms ed auals na amo uschè influenzats da l'uman. Quels sun prezius per differentas creatüras e plantas. Ils duos co-autuors Martin Arnold ed Urs Fitze han fotografà 23 da quistas auas in Svizra, tschinch d'ellas in Grischun e trais in Engiadina, e scrit ün cudesch lasura. In marcurdi ha Fitze preschantà il cudesch a Scuol i'l Bogn Engiadina. Preschaints d'eiran eir Anita Mazzetta dal WWF Grischun e Philipp Gunzinger chi maina il proget da pilot «EN-Engiadina» (anr/fa) **Pagina 7**